



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 847, Datë 16.11.2021

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË EUROPCAR MOBILITY GROUP S.A NGA SHOQËRIA VOLKSWAGEN FINANCE LUKSEMBURG S.A DHE TRINITY INVESTMENTS DESIGNATED ACTIVITY COMPANY.”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Znj. Rezana KONOMI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 16.11.2021, shqyrtoi çështjen me:

Objekti: Autorizimi i përqendrimit të realizuar nëpërmjet përfimit të kontrollit të shoqërisë Europcar Mobility Group S.A nga shoqëria Volkswagen Finance Luksemburg S.A dhe Trinity Investments Designated Activity Company.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfimit të kontrollit të shoqërisë Europcar Mobility Group S.A nga shoqëria Volkswagen Finance Luksemburg S.A dhe Trinity Investments Designated Activity Company.

VËREN SE :

Transaksioni dhe procedura

Pranë Autoritetit të Konkurrencës, është depozituar njoftimi mbi përfimin e kontrollit të shoqërisë Europcar Mobility Group S.A nga shoqëria Volkswagen Finance Luksemburg S.A dhe Trinity Investments Designated Activity Company

Referuar dokumentit “Kontratë Kuadër Transaksioni”, palët janë:

Pala 1: Volkswagen Finance Luksemburg S.A është një shoqëri aksionare, e themeluar, sipas ligjeve të Luksemburgut, me objekt aktiviteti: pjesëmarrje në shoqëri vendase dhe të huaja, ose në shoqëri të çfarëdo lloji, si dhe të menaxhojë këto pjesëmarrje, të marrë pjesë në krijimin, zhvillimin, administrimin dhe mbikëqyrjen e çdo shoqërie ose ndërmarrje, etj.

Volkswagen Finance Luksemburg S.A, zotërohet tërësisht nga Volkswagen Aktiengesellschaft dhe është në pronësi të plotë të Grupit Volkswagen.

Volkswagen Aktiengesellschaft është një shoqëri aksionare, e themeluar sipas legjislacionit të Gjermanisë, me objekt veprimtarie: prodhimi dhe shitja e automjeteve dhe motorëve të të gjitha llojeve, pjesëve të tyre si dhe të gjitha sistemeve, makinerive, veglave dhe produkteve të tjera teknike. Shoqëria gjithashtu mund të krijojë degë brenda dhe jashtë vendit, të themelojë ose të blejë shoqëri të tjera ose të marrë pjesë/ investojë në shoqëri të tilla. Volkswagen Aktiengesellschaft është shoqëria mëmë e Volkswagen. Group.

Grupi Volkswagen operon në Shqipëri përmes 2 filialeve të mëposhtme:

Porsche Leasing SHPK është një shoqëri me përgjegjësi të kufizuar, e themeluar sipas legjislacionit shqiptar, dhe me objekt aktiviteti: veprimtari e qirasë financiare, agjent në sigurime.

Porsche Albania SHPK është një shoqëri me përgjegjësi të kufizuar, e themeluar sipas legjislacionit shqiptar dhe me objekt aktiviteti: shitje me shumicë dhe pakicë të automjeteve të të gjitha llojeve, pjesëve dhe aksesoreve të tyre, kryerje e riparimeve të të gjitha llojeve të automjeteve, përfshirë montimin e automjeteve të përfunduara, modifikim i automjeteve dhe prodhim i pjesëve dhe aksesoreve, etj.

Pala 2: Trinity Investments Designated Activity Company, është një shoqëri me përgjegjësi të kufizuar, e themeluar sipas ligjeve të Irlandës, me aktivitet të përcaktuar në përputhje me ligjin irlandez “Për shoqëritë Tregtare”. Trinity Investments Designated Activity Company është një shoqëri mbajtëse (holding company), e themeluar me qëllim për të investuar veçanërisht në shoqëritë që janë në fazën e rritjes dhe rastet e ristrukturimit.

Pala 3: Pon Holdings B.V, është një shoqëri e themeluar, sipas legjislacionit holandez, me objekt aktiviteti: Aktivitet financiar, ofrim i burimeve njerëzore(nuk ka projekte punësimi).

Pala 4: Green Mobility Holding S.A (Bid Co), është një shoqëri aksionare, e themeluar sipas legjislacionit të Luksemburgut, me objekt aktiviteti: pjesëmarrëse në shoqëri vendase dhe të huaja, ose në shoqëri të çfarëdo lloji, si dhe të menaxhojë këto pjesëmarrje. Shoqëria mund të blejë aksione, kuota dhe tituj të tjerë, obligacione të pasiguruara, certifikata depozite dhe instrumente të tjera borxhi përmes nënshkrimit, blerjes, këmbimit, dhe në përgjithësi të gjithë titujt dhe instrumentet financiare që emetohen nga subjekte ligjore publike ose private, etj.

Volkswagen Aktiengesellschaft përmes filialit të tij Volkswagen Finance Luksemburg S.A krijoi shoqërinë Green Mobility Holding. Qëllimi i vetëm kësaj shoqërie do të jetë mbajtja e aksioneve të Europcar Mobility Group.

Pala 5: Attestor Value Master Fund LP, është një partner i kufizuar i themeluar sipas ligjeve të ishullit Kaiman, Island (garantor i shoqërisë Trinity Investments Designated Activity Company).

Target: Europcar Mobility Group S.A., është një shoqëri aksionare, sipas legjislacionit Francez, me objekt aktiviteti: çdo blerje aksionesh ose interesash në ndonjë person juridik francez ose të huaj, si dhe çdo aktivitet që ka të ngjarë të kryhet nga një shoqëri holding – ku shoqëria merr pjesë, me çdo mjet, në çdo operacion që mund të lidhet me qëllimin e saj ose nëpërmjet krijimit të shoqërive të reja, etj, në kuptim të nenit L 511-7 i njohur si Kodi Monetar dhe Financiar.

Europcar Mobility Group S.A, nuk ka filial të regjistruar në Shqipëri.

Referuar “Kontratë Kuadër Transaksioni”, të lidhur më datë 28 korrik 2021, palët dëshirojnë të blejnë të gjitha aksionet e Europcar Mobility Group dhe dëshirojnë të kryejnë transaksionin e propozuar përmes një oferte blerje vullnetare të dorëzuar përmes shoqërisë Green Mobility Holding, të përcaktuar në këtë kontratë.

Palët kanë rënë dakort që Trinity Investments Designated Activity Company dhe Pon Holdings B.V, të bëhen aksionar të shoqërisë Green Mobility Holding S.A (Bid Co), pasi të jenë marrë të gjitha miratimet antitrust që kërkohen për Transaksioni i propozuar. Pas mbylljes së marrëveshje Volkswagen Finance Luxemburg S.A do zotërojë 66% të aksioneve, Trinity Investments Designated Activity Company do të zotërojë 27% të aksioneve dhe Pon Holdings B.V do të zotërojë 7% të aksioneve në shoqërinë Green Mobility Holding S.A.

Transaksioni i propozuar konsiston në përfitim të kontrollit të Europcar Mobility Group S.A nga shoqëria Volkswagen Finance Luxemburg S.A dhe Trinity Investments Designated Activity Company, duke plotësuar kriteret e nenit 10 dhe 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Vlerësimi i konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i dhënies me qira të automjeteve, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Volkswagen Finance Luxemburg SA është një shoqëri Holding e Grupit Volkswagen, grup i cili operon në Shqipëri përmes shoqërive të zotëruar indirekt prej tij: Porsche Albania SHPK dhe Porsche Leasing SHPK, të cilët janë aktive në tregun e shitjes së automjeteve dhe në veprimtarinë e qirasë financiare dhe agjentit në sigurime.

Trinity nuk ka asnjë investim në sektorin e marrjes me qira të makinave. Trinity nuk ka asnjë filial, dege apo zyrë përfaqësimi dhe nuk realizon xhiro në Shqipëri

Europcar nuk ka një filial të regjistruar në Shqipëri.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dh për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet përftimit të kontrollit të shoqërisë Europcar Mobility Group S.A nga shoqëria Volkswagen Finance Luksemburg S.A dhe Trinity Investments Designated Activity Company.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS